





農丈人文集卷之十六目錄

祭文二十九首

同沈肩吾祭座師余夫人

祭余相國夫人

祭沈太史肩吾母洪太夫人

工部祭張相國

祭少司徒溫公母

同同年祭同年南雍博士葉本公

祭陝直指沈公



載祭沈直指

祭柴方伯母太安人

祭葉封君

同府祭葉封君

祭梁中丞母

祭沈嘉則

偕同年祭楊母

祭黃憲長

祭毛親母

祭屠親母封孺人黃氏

祭林封君

祭郝太宜人

祭封安人方母

同越州諸公祭李憲副

同郡祭馮封君

祭劉年伯

祭傅長孺吏部

祭馮比部



農丈人文集卷之十六  
同社祭會友張教諭

祭大兄

祭元二嫂陳氏

祭羅妹夫

哀辭一首

李侍御母封孺人哀辭

農丈人文集目錄卷之十六

農丈人文集卷之十六

古鄆余寅僧杲著

祭文二十九首

同沈肩吾祭座師水夫人

夫何皇隲之孔明兮時錯戾而迂施疇若淋斯  
多罹兮不良白而分之胡大命之奄忽兮喟聖  
善其焉追惟美質之宛夷兮直都梁之與纈也  
彼中貯之瑩的兮何異夫遺密也條五族胥鬯  
之兮各用叶於維宅也載尚德而好齊兮亦古



者之摯匹也念慕者在其大人兮吾何愛乎以  
力飭又在昌其胤人兮吾歸之以百熊羆豸萬  
馥之如樹兮壹正刑乎夫君伊其張而相之兮  
等焜燿乎上勲誠不以幅兮安尋尺之謂勤謝  
豐至之雨集兮垂千秋之氤氲中黯黯而不可  
釋兮托楸檟以遠聞重曰陰陽遷化率以厲兮  
胡疹斯乘在婉孌兮豈伊方中溘永稅兮維山  
崔嵬水澎湃兮不朋以嬉在日際兮嗒其摧傷  
視上帝兮無幽叩聞詔菌桂兮

祭余相國夫人

彼鄮者汭靈源篤備鞞鞞懿姿聿來作妃姱脩  
婉攝具體自然如彼望舒視曦與旋含徽內瑩  
宣慈外令姆有初言曰維無競奉襄夫子男事  
在雄俾也往邁無終食糝盱愉尊嫜忘其致及日  
克舉孝心以迓萬吉於時奮庸慶至若襲猶追  
窮約在舊之執深惟長如逮及諸兒小大宗親  
誰斯恩斯自昔大老偶必以類允對上公曾茲  
德配上公入輔



九廟悅喜彌聞光贊禪其綱紀云胡陽九不良  
其行積蹠致中遽游紫冥嗚呼哀哉天事有常  
爾乃鑿聞疇是孔遠半道以分凰之于翺不耀  
其首誰令璿房太息良友白日其晶素帷孔明  
何況吾鄉無勤音馨嗚呼哀哉

祭沈太史肩吾母洪太夫人

厥有開右曹極而賈鄂鄂于誕籍之庶門寔瑯  
斯備臭容以睟有委鬢紛何貌不治則友媯來  
嘉詡雙哉如彼紈縞設以五緹維時寡哀莫震

其命疊言埴之夙夜于鏡侷侷倂据卒紅作痛  
曾是壹息而安處腴於純纒緝神具歆是吉光  
秦朗七子厚贖夫君沕茂游天之倪茫茫日景  
準平土圭言篤之侑言獲之奏墨食實者弗何  
究究洵媿百鍾唐唐巨洪帝載貶賞冠帔爾  
恭肅邕燕處遐不邈止躔宿告凶莫回人事嗚  
呼哀哉皇于敬德詔其土臣萬里來奔折俎  
孔殷詎翅人綱亦首天錄紛紛煇蕭徬徨墻屋  
嗚呼哀哉無壽不豈代之信壘胡若命司相其



皆似嗚呼哀哉孰勿繫家孰勿繫邦孰是斯閔  
汝興是訔嗚呼哀哉于何劭劭于何喞喞亦哉  
聖規永觀飛燭不盈羶薌損我永歎淚彼下泉  
誰之萑瀾嗚呼哀哉

工部祭張相國

嗚呼惟漢及衡受有鉅鍾爰生偉碩登為上公  
上公初起作帝家時夙夜無遑伏思憑几憑  
几維何冲聖是荷式盡進弼保完大家有猷  
必力有法必飭計安元元以靖方域日之始曦

畢身赴之萬機在躬敢偷而嬉歲月積輩精神  
代潰辰次告凶卒與厄會嗚呼哀哉上公有文  
爛為卿雲敷奏以剴訖於我君寶錄既輯寶  
訓既集凡大典制皇宸用熠上公有勲遐邇畢  
臣芬芸德譽施於不賓載觀外庋以及內府治  
之緒餘何弗克聚惟是尋尺以規百辟柰何弗  
終永即厚夕嗚呼哀哉大河瀰瀰曷其迤矣大  
風哆哆曷其駛矣大旒靡靡曷其轟矣嗚呼哀  
哉



祭少司徒温公母

於惟姝質翔洽華池作嬪者士穆有光曦如桓  
提汲如孟齊眉章施宗闕九十其儀迓天之穀  
期慰我禱閨杼嘗拮戶戾空炊乃鍾獨美乃集  
厚禧乃發司徒碩大且頎厥始司徒嚴恭是師  
蹇誠亮節母教勿欺暨於出撫入柄度支惟平  
惟允母教師時載其篤睦迎 帝之釐褒云嘉  
淑游是寵綏盱徐大老白髮雙垂介爾景福孔  
來如茨如何並德不並期頤驚颺泰竭溘焉告

哀告哀云何徹於 皇扉乃蒐故典各庀爾司  
乃命郵人無滯靈輻凡此希特寔眷母慈生有  
隆第歿有憫私如母何憾孝子傷悲空原邈迤  
朔雪皚皚噫嘻何從在天之涯在天之涯視我  
酌辭

同同年祭同年南雍博士葉本公

嗟夫今年吾榜何厄甚邪無論待詔公車者三  
十許人而無一人之入彀也即吳朝光蹂而死  
周明卿拜校官而死壹是閔凶至於斯極何更



益之以吾本公邪本公恢達洞爽荷重之器又  
良於其所賦與聲騰起爾書豈一旦誤邪矯矯  
天路寧須重繭而至邪獨柰何嗑而死邪嗟夫  
朝光之危禍希覲之事也推類言之命也本公  
在宦十餘年作士無慮數百人視明卿纔且呈  
身不能出都城門一步食官一日有間美顧獨  
非黔羸者裁其尺幅不令稍展其夙昔邪故陽  
九之說三君之遭也迺又有兩賢相阨者至今  
海內淺之捧腹甚之齟息又甚者怒髮直冠矣

彼其死者無可如何夫何生者卒亦不可究詰  
信乎吾榜之厄甚也夫命有必至獨念大義不  
可或傷吾儕哀本公之意儻在斯乎儻在斯乎

祭陝直指沈公

嗚呼公潔精朗徹光於天宇抑其曹豈非所謂  
吉人鮮有右於今茲者哉胡不為秦人福而遽  
以悲也公之按部適當溽暑無幾何受事文闈  
其勞五之既而受事武闈其勞三之當文闈之  
既撤而武闈之未扃也即稍借須臾之間何不



可者廼不敢一息偷假猶作同商之行聞在兩  
州車不可馬以代之晷不足燭以繼之讞獄無  
慮百數十率取畢一日他務稱是蓋其勞十之  
又居常自念某家鉅當先某家棘當先譬言之夸  
父逐日無裒道暘卒於棄杖儻所謂盡公不顧  
私竭身而無貳慮者邪嗚呼天監在勤帝眷惟  
媚是何明神而不少護持徃歲乙酉大梁沈公  
先此遭罹不謂公之姓同月同又皆武關既竣  
之日也公既疾謂言臺中諸公多不願入秦吾

獨不畏秦今果然又顧吾等而詫曰大數其終  
乎嗚呼其然豈其然邪公五昆弟三人以科名  
顯獨公成進士讀書中秘出為臺史為臺史有  
聲江淮間至於秦藉甚物不並大美不獨鍾斯  
固鬼神所指目也獨奈何天高難問地厚難窮  
彼華與渭不能二百里而亦不屬公之頂踵使  
夫賢者拊心志士奪氣公之所謂數或者在斯  
歟不然如公而有今日吾烏能知之吾烏能知  
之尚饗



載祭沈直指

嗚呼人之大願在親善人親之如何與相遵循  
願之如何逢彼昌辰長有德友永作國珍孰天  
無槩至公而嘍遭之云慘失我嘉配自我在事  
有繁其輩豈不愛之或不敢賴惟公厚良聰穎  
異常人激其裏事燭其苦所其大者游仁之鄉  
清為之幹輔以委詳負茲大斧何止觸暑夜不  
知丙日不知午蹈華跨渭亦越深阻不敢斯須  
偷而寧處與公躊躇僅四月餘諸所賞識皆公

本初果有以異異彼魁昏來乎何晚去不須申  
嗚呼哀哉懼之不競視秦為穿公獨毅然我生  
有命豈帝之聰不聞斯令不為秦人植其恭敬  
嗚呼哀哉公之遺言一字不欺公之心事道路  
所悲凡我百司莫不念私莫不念私我哀不支  
嗚呼哀哉

祭柴方伯母太安人

嗚呼率彼秦冑瑤藻具充况也積祐作輔春融  
維嘉維齊稱於德雙協帝迎祉受有駿龐厥駿



伊何邁而駢力厥靡伊何蓋臣是式桓桓風猷  
截行方國 皇於寵加爾崇是勅嗚呼謂天壹  
量而翁不延謂且莫量母無百年孰佐之靡孰  
祝之穰惜惜蘊結均施獨饗既成釐之又或披  
之陰陽纏糾牢人亟思寧造嚙指邈惟頰尾萬  
里來歸母遂不起嗚呼哀哉彼斑者瀾涕淚蒙  
漫孰是魂斯去絕無端緬惟孔夙以景徽穆怛  
其何從薦此芳苞

祭葉封君

嗚呼公以昨歲之夏抵京師而以秋還是時乍  
見公拜起甚便竊喜以謂黃門公是時黃門公  
方抱東門吳之感恐憂其大人日夜棘心而乍  
見公動履矯健無改平日不勝喜以謂寅也柰  
何不半歲遽有斯事邪今歲之元夕公書來訊  
我訊我已侈矣又輒稱不腆嗟夫此豈賤子所  
敢當哉嘗黃門公在郡時公春秋七十高矣郡  
太守公嘗命寅為語祝觴寅為舉里中謠曰黃  
河易得清鷄犬難得寧君不見葉家翁前杜縣



今後走丞蓋斯二事黃門公以謂我皆質行也  
迺太守公勿善也竟削不用夫頌公孰有大於  
斯者無論稱觴即今茲所以計窳窳永永不朽  
能廢此兩事乎然則公之信義灼然如觀火由  
為黔首至於白頭毫髮可洞也官府見嚴不招  
為權利鄉閭見德不博為名聲黃門公於郡善  
祛蠹於省善緣事致忠蓋皆公之所式刑之斯  
所謂肯乎嗚呼寅於公有不及盡之報私而又  
有不及致之頌私皆噫事也彼蒼胡不須臾公  
嗚呼哀哉

同府祭葉封君

亦越義傳篤老不休雖貴無華質惟與速嶽之  
白若善人來宅其才不逾其德則百嚴而無臆  
自其蚤年大信有穰無歲不蠲以斯皎勵維衡  
上帝誠不以些言錫之顯第郡有直司庇我萌私  
作朕耳目普天在禔皇嘉有子褒來如壘赫赫  
寵光迎其壽始天錄孔殷當戶生且盥誰洋大千



僊路未分施則思膺報則思巨咄嗟萬里朔之口  
何許中情有宣明繒爛然莫卒此篇告之衷言  
祭梁中丞母

嗚呼母來奚邪母來造梁邪母去奚邪母造梁  
不遂造我 天家邪頃者

主上念中丞公勞苦塞上久召之還豈將媮暇  
公哉經紀方域董訓倫類其大者重有藉焉而  
卒以母去聞是時公才抵長安三日耳

主上順神穆清不及召見公三事大夫倉皇不

識從何所邂逅公後生之望景光而趨者若觀  
喬雲旦暮失之嗟乎母棄去何遽也母之賢不  
能知吾觀中丞公博大而有沉思率勤荒微以  
貽今日之安則母之所遺之遠矣不然朔方亦  
孔棘矣山固多兇黃河不乏颶飈卒竄伏不敢  
逞其誰賜有此特不識是時從觀賀蘭山否邪  
公茲還頓首堂下謝不時起居者母大歡兒斑  
襪無改律昔乃其色更鮮好矣又不識是日也  
從渡滹沱否邪是皆公之巨愴無時消解某等



受事秦中有夙昔之誼於是邇而哀之其辭曰  
白薇兮變衰厄之來兮誰蔡洵有媿兮孔秩第  
且祿兮以祁玄陰兮暴殯翳重幽兮何期恢爽  
明兮愷烈抑游篤兮謀斯神不沈兮開石卒罔  
奏兮默持隨之隆兮求漠空號兮勁颺誰者兮  
顯假鬼不靈兮違帝思雲踳踳兮若睨風肅  
肅兮裳衣倘忽荒兮無閔想遐止兮在茲

祭沈嘉則

夫何黔羸之不可馮兮儵兮踴而暴割黯不識

皇矣之繇篤兮指蒼天而問曷恟耦俱之愴恍  
兮淫涕雨而汜紛懟余辭之掇掇兮熾余衷之  
不焚迺夫英產之魁特兮山與川寔胚之矯雲  
霓而直上兮孰躡景而追之蓋亦頽首而受程  
書兮睨削方而耻為諧盲不辨閭姬之與宮娃  
兮日御前而彌乖彼周廬亦何足陸兮誰禁草  
澤之自豪苟余命信以錮兮吾將逃之手苑之  
騷曰開宗厥惟正始兮胡支裔之孔出也寧少  
樛榼以為檀兮將無蕭艾而蠶蠶是匹也日轂迴



而再中兮是何經軌郁以郅也國風洋洋而滿意兮獨異人而高為烈叶力切也劬鈞天之希奏兮總百代而壹至肆氣類之殷叶方切兮號下里而樹之植胡大運之中否兮乘赫曦以陰霾堊堊堊之旦暮兮喪岌岌之丘崖哀哉大雅之不振兮抑盡極其焉排亂曰士有百恫何細之論系龐洪兮雖有至人豈不亦隕大雅云崩叶悲切兮肆好維風泱泱秦邕遂錫黃鍾兮誰不扱衽誰非崇施方夏詎同兮睠茲朝露隱軫仍互蓋偶

之逢兮其來何從其去何憑安知斯之慟叶徒切兮

階同年祭楊母

嗚呼昨歲于邁邁彼東土厥祉靡量如日方午於頃少選歛歡為悲救帶有翩其歸素輻嗚呼哀哉母亦念出出迺遭饑匍匐抹之臣心若疾臣涕亦涕臣嘻亦嘻憫茲赤子無言不怒今歲之春百穀具籽母意霍然為加一七柰何明神報仁以讎痛之云鉅甫麥之秋嗚呼哀哉於惟



名姝來嬪冠族精采肅盥載其嘉馥中更摧蹇  
為暵為發赤爍相之鬱鬱收于罹維祐有靈洵美  
是錫博碩爽塏纘戎祖歷亦視仲植亦李聯躋  
畢事失子慰彼下泉下泉之思以勗胤子果食  
其實華冠佩紫奏福便便孝子來前遂躋七袞  
且篔且筵維茲舞筵七夕再旦誰謂大期凄其  
永判嗚呼哀哉匪直也述厚傷吾倫豈繫尋尺  
况迺世因不禁素商日夕惜冽無將斯將寄之  
糲設嗚呼哀哉

祭黃憲長

嗚呼公以八月之朔抵秦而以十月之望去秦  
中間在事才七十五日耳當是時大中丞直指  
使者與夫藩臬諸寮襟吟不吐目眙不決手其  
䟽不遽聞豈徒以貌事公哉誠不忍其素也夫  
公從己未進者也既辛未一星甫終耳遽退而  
歸養也既癸未一星又終矣兩大人已不可追  
矣是時故人多列孤卿者公稍從郎署起是時  
論恬退曰杞有人焉論遺榮而亟其私曰杞有



人馬論羈而不即驟曰杞有人焉故五年之間  
游歷三品以是為酬公也嗟夫豈知公處厭棄  
人間世邪公去秦之日吾等叩分陝使者范介  
儒黃公望重是且翩翩霄漢間恙其柰公何介  
儒愀然曰固也獨須禳明年馬日耳果然公以  
是日再厄於二豎竟不起然則祿命信有憑邪  
嗟夫公曩者從浙已從郢或浹歲或不浹歲當  
是時風薄具區而雲行乎漳之渚其志念寧有  
涯哉迺不能百一而從秦從秦不什一又捐之

去其大者不令見端其餘者又靳不肯予天之  
於公亦稍愆其常矣是故吾等反袂掩面稱白  
日之窮壹宣其意上之靈凡詩有之生芻一束  
其人如玉嗟夫公之無點於白日也是公之素  
也他復何論哉

祭毛親母

藐西垞之珎滴鍾嘉葍之幼清體馨致之靜閔  
宛秦穆之粹晶系世閔之亭育號禮宗乎舊闕  
郁嬪宮之敷馥發鏘鳴於瑞珩克茂膺之媿稟



遵古淋之上蹤躬婉婉以旋屬前愉抑乎尊嫜  
雍貴驕之根莽變孔膠於君卿既狗恭而篤娣  
亦推悃而逮臧繫蓀蒞之擘禩禔殆紛褻而繁旌  
暉昌陽於宗祏熹佳胤之曾嶸禔元祉之櫛比  
永有曜以脩征詎寶婺之歛彩墮爽靈於忽荒  
歎護顏之阻怒誰侍鞞乎齊鄉顧衿輦其何恙  
縈萬折而割腸式吉纓之初諾咨孟陬而告將  
胡陰氛之纏邁彫貞實於薜英嘻運途之屯舛  
蹶短日而難平想望舒之載魄更何幾而重光

寧昏姬之盡怛何結懣之能央藉蕪辭以申臆  
倘彷彿乎雲軒

祭屠親母封孺人黃氏

嗚呼是惟齏大夫屠田叔先生之元配封孺人  
黃氏歿既踰年而今年乙未夏五已丑田叔友  
人余寅治草具操文而奠之其辭曰維封孺人  
如瓊如璧黃之諸姬寔惟首珍而適我齏大夫  
生男稱替生女稱姝以克靈承於屠厥惟都哉  
齏大夫在公無歲不同忽爾誣蒙亦遽大終嗚



呼宦有薄從壁景之必躬吾謂封孺人百不宜  
從宦有薄違壁彼翔肉不並翺飛吾謂封孺人  
百不宜不歸胡云其瘕揚之水遭迨越而顛豈  
數則然惟齶大夫揮涕謂我吾貧有相相在鴛  
瓦宦游二十年如適荒野敢私闖闕輒相侈假  
亦楮七箸微聞喟聲子寔有命何乏何羸享子  
官祿免子耦耕如子所處用物已弘壹是泊志  
襄我於成我聞斯語一歎百楚徃有嘉緒吾不  
忍口舉鏤我心旒有風密雲狂飈判之爛彼鵲  
禕勿其永衍之誰俾冥漠一朝旦之我不知吾  
年寧我裸之尚饗

祭林封君

嗟呼公以恬夷坦白潭綜大業頡然抗引於博  
士弟子之林當是時摩厲以須寧有解日乎而  
卒不售夫公之業蓋傳之先伯子淹抑久宜徵  
耀於公又公之先子操岐黃之術沛德於吾土  
不責報吾土頌其明施迄於今如一日又宜公  
之襲發芬采永函被之然不售嗟呼此以公之



業論也若夫端凝靜漠其表雅飭其衷虛徐得之恬安不得之亦恬安行之身衆以為吉其儕之見且聞之謂為祥吾以為世必無僂道如有僂道不過如公其人世必無梵王道如有梵王道不過如公其人而公之壽竟何如也聞公一二年間偶所酬對嬉譔頗不覺不忌不諱語令人咄咄怪詫公豈厭世邪豈嘗洞晰化運若晦明晝夜此其殂翕大還之日邪以為偶也是窺公淺也以為誠識大還若期會莫可遁逃也天

胡以爾也嗟呼公之閔舊矣天不注之公而注之侍御公與其仲行且以文學顯及諸孫盡雋子弟也淵凱忠靖烈烈濟濟大集明德之門凡世所榮艷每膺若上帝環而顧之遂挈而私之又胡以不靳若是則篤公劉之什可繹也然則公可瞑矣嗟呼公逝以六月吾真以十一月得無太迂顧夫愴痒惻臆曾不後諸儕公能翩然彷彿來聽吾言言否邪嗟呼公不能翩然忽下來聽吾言也公果逝矣可勝怛悼哉



祭郝太宜人

嗚呼太宜人既窆之明日為歲癸未九月辛卯  
越人余某奉 上命有事吳王始至於廣陵越  
二日癸巳刲牲治楮陳之奠適醑太宜人而并  
以告我 封比部寅樓公夫人世之事有萬總  
之遂志為難是故其始思給足既給足思顯榮  
既顯榮思久長所謂久長匪直其身之享大年  
又以詒其孫子使世有之故一之者萬而處一  
二之者億而處一三之者兆而處一所謂均於

白日而獨昇舉者非邪嗚呼何可易言也乃比  
部公不階寸資由布衣稱素封未幾以少叅君  
之貴獲有 誥封比部公享年八十有四太宜  
人八十有五當是時無論淮揚即大江以南如  
公崛起者蓋亦一二氏然或可與埒富未可與  
埒貴可與埒貴未可與埒年即不幸少叅君侍  
公無終而吾謙伯又巋然登名 天府巽伯亦  
號能其家詩所謂勿替引之斯之久長可謂人  
世多有之哉往公嘗以謙伯屬我師之故公平



生所羨慕與其議論皆得具聞太宜人併精駢  
力佐公以興忍創撫遺報公以完卒之舉公所  
未畢之志身督之而身收之是故公歿於十年  
之前太宜人歿於去年皆可以含笑名之曰仙  
者遊乎寅北來拜公隧門宰木大拱太宜人亦  
既坏土感人世所遭值歎具美其在茲故茲奠  
若與公說所夙昔儼然如或見之也尚饗

祭封安人方母

大庾宛延中有璇淵扶輿完淋是鍾慈媛待三

有軌來配君子肅靡其儀瑩於嘉履雙德維禎  
帝鑒孔申神羊六秬作瑞郊麟駢駢駿發象在  
上列 皇於寵嘉鳳冠斯業母於斯時亦既徵  
只如彼杼襄無弗登只母於斯時亦既諧只如  
彼熙明無弗佳只大運有遭樂以哀遷胡百其  
受不百其年驚飈大厲炎海若沸何堪萬里永  
言捐背不徒我懷亦暨同儕青女之候歛翳且  
靈輿潞之瀾瀾爰馳爰駛有繫此辭其明如水

同越州諸公祭李憲副



嗚呼世籍才諳亦欽德度胥輔而行張我國步  
抑唯天申假以修數乃克揚邁厥有鴻樹惟公  
長者寔來東顧漸江以左億有攸聚越希得歲  
幾與福晤帝以賜我及履共渡居有專城出有  
跼注奉宣多狀湛以時澍誰謂金函猝與閔遇  
萬方來同莫親臚句既奪諸浙俾黔是赴又奪  
之黔歸之大暮前是匝月降割在姬神魂播墮  
焉無及什靡不遘凶酷至如雨賫此大旋何天  
可訴誰能釋哀矧茲溥酷

同郡祭馮封君

嗚呼先民有程得時則駕否者蛇龍托之玄化  
彼驕者子視為偶然利極而樸卒歸乃賢乃賢  
維何洵真是篤其被繫褐其懷維玉名都之號  
迄無必償卷馬自怡以退為翔厥滅斯猗龍有  
雙琥隲是用特為瑞下土我峨方嶽提封靖熙  
季也抑畏何荷不冝誰之嘉穀庸式以喜寧之  
我躬而羸吾似有煒黻裳帶索輦之有鑿精粲  
斲苓代之乃來司寇狎盟平泉塤予篋汝八十



二年嗚呼無嬰世網有申天錄逝性孤踪樂行  
其獨韋布所植垂於千載後生何觀白日忽改  
嗚呼質在在貽名在在思徵士邈矣慈水之湄

祭劉年伯

嗚呼莫不有鍾壹者之宗後有萬從况也經筵  
紛綸不啻因壘為幟廼英者儔帝命來游于東  
冶丘平受漳海以浴靈宰何施不彩乃馮奧區  
鬱鬱為人殊其藝孔都天華其句不華其遇封而  
寘樹孰緒斯端望所伏蟠俾也噴岼爰發昌邳

彬文與質如其家率維督迨季替為計吏季猶  
需次昨歲南宮謬名誦通寘籍季中遂及季黨  
諧心以往無不兩賞日月幾何訃來則那以泣  
繼歌司祿安在無壽不愷古亦予詒塞旒中流  
抱我好仇涕不可收

祭傅長孺吏部

嗟夫吾初不識君顏狀已解逅君於吾邑令君  
所而後知此為傅長孺矣已君北邁吾持一樽  
與君言別蓋曰吾徒聞長孺有矯矯名吾試叩



其抵裏何若蓋至於是日而又知長孺言論丰  
采又若此矣當是時君從羈旅入朝耳不聞  
建一訐謨用一瓌異之士而首以鄙薄起之巖  
穴之下而委以藩服之重何汲汲也已屠田叔  
歸對我言之乃憮然自傷以余之臃腫不得當  
一世而君獨毅然推引長孺豈真知我邪然吾  
退謝之心已匪石不轉輒屬田叔為我謝長孺  
吾無以報長孺者吾將以不出報之今吾已大  
遂厥初而君獨柰何乎奄然物化不共嘉獎我

高蹈事也嗟夫世事何極天道難論君潔廉太  
苦至非情所貞即古烈丈夫寧嘗過之疾大病  
憤憤語皆天家大事一不及其私既屬纊猶  
視聞太宰孫公撫而瞑之若君志大中堅極身  
無悔他日者於天家事何所不可為而遽至  
斯是不足為天家大慟邪君今已歸淺土吾  
當蒐輯高行誌君之墓視吾力所及問君之孥  
當不使有朝夕之慮吾豈以一圭組感君世固  
有不質券而信不緘滕而固者君真古人我敢



沒沒流俗不自効於皦日哉因酌之卮酒而告之以衷語尚饗

祭馮比部

嗚呼君舉三年而第第而分符百粵之巖邑邑凡幾年而入為部部又幾年而出稱部使者治吳會獄人生患不得展布耳即今政在嶺表法行江介關白如志擊斷在手斯豈非庶幾豪者一二事使假之時月進會運期興濟事功獲所滿意直坐有之耳胡不湏臾而遽一旦輒轍而

旋嗚呼凡吾所稱謂所可知者至乎白髮彌垂烏私蔑爾青閨莫續熊兆邈然兩者皆造化之所不可知世固有遭之不意咄嗟乃在今日夫數者莫識所來安知所往是故曠達之士一笑置之君又安能如之何哉吾是以悲君輒又釋君君聞得無遽曰然

同社祭會友張教諭

嗟呼亦有含毫腐厥乃心孰是焚膏有如沃燭豈其受辛沒齒於蓼往之脩途壹睨宵渺嗟呼



君真其人號時之雄豈不曰售初登釜鐘既其  
誦通太常籍奏有鱸顧之載馳載驟嗟呼命亦  
何常要於厥終誰龍誰蛇總之是逢儻所意願  
伊於胡底以今併觀良亦慰只嗟呼當時組纈  
詎不如雲幾人遭遘於時氤氳况矣晨星落落  
幾輩又喪我友使我歎喟嗟呼云何旅旄歲晏  
來歸有淒霰霰雪紛其以飛曷用將之托衷茲誄  
庶幾肫恂以贊明水

祭大兄

嗚呼我之自徙寔惟白杜踰十七紀旋其成聚  
我祖古真我父德鄰我兄盈去亦越忱恂日之  
曠曠甫當泰會未熾而圯亦孔之沴祚未云殄  
恃天為延辟彼射鮒何棟也遭素心如冰以惟  
中否得不誇詡失亦自喜帝卒鑒只薄集眇躬  
敢攘龐篤據為顯庸柰何厚鍾承以綿植掛冠  
來歸斥曼斯息人有厓域所貴遵循寧遜威鳳  
千仞嶙峋炎中難撲比於烈燄宜其惋我至過  
其半我謂我兄宜不其然非嗔非嘯時亦及旃



嗚呼傷哉兄在為壽我在為富  
有識校之誰枯  
誰幾死往之年我多闕焉  
凡後斯年我敢不虔  
惟是枋榆為我廓落靡靡  
以嬉于以朝夕胡其  
奄忽棄化而歸兩兄蚤謝  
靈光又微嗚呼哀哉  
無論閭井墟厥媼戚有過  
其儀同枝遂析嗚呼  
哀哉生不酒酒臨盡猶呼  
觥罍具旅柰此清醕  
嗚呼哀哉

祭元二嫂陳氏

於惟嫂氏允克稱母又允稱大母  
遂有曾孫稱

曾大母厥初作輔中歲作字是有譽處以無墮  
於厥祖嗟夫閭儀盛有九十在柔世之回辟乃  
百斯朧惟質任者若希若夷無側以頗咸柔是  
為嘗事繼姑別無他端而嘖有譙言亦嘗為姑  
其舍寔繁篤以暵暵色不至忤語不至啾遜不  
外假戾不中赦接遇無諼倉猝無乍諸舍之中  
誰其雅化我化我安否亦用寬如謂迂緩古亦  
大難踰八十年曾不半闌其年可及其德不刊  
嗚呼休哉天祚諸孤嫂寔來模天不祚諸孤嫂



遂大徂我於行為叔理無須諛竊式下景敢惜  
華歟命諸弟斲命諸子孫趨于以陳糝于以薦  
菹以哀我宗余尚饗

祭羅妹夫

嗟乎君何若爾遽也聞君且逝輒瞪目而詫乃  
我寧有遽至斯者起起其以劑來劑來強作吞  
飲頃之踣矣然則君固不識斯瘍能踣人而君  
又搖杙嘗十趺願柔不一奏負其羸劑以與日  
構抑又能踣君也嗟乎吾就榻者數竊怪君無

一語相屬遺以為神識少儷豈謂猶作壯年人  
想也宜君臨諱不肯吐一衷語也嗟夫君氣仁  
膺腸厚細人欺之益假以仁然其胃際烟若卒  
亦不可盡平而口訥或者相提論說即在介末  
益又訥量校歲穰土殖山君海王與其時節若  
造化有為僕之者是以豐溢總至而小心畏忌  
不作禍始人亦莫能禍之邑里翕然傾嚮曰閭  
右有斯人乎嗟乎以此迎禧何福不注已壽矣  
無邾兀兀若羈旅大似無年坦而括髮一何累



羸獨為一女不瞑人謂君之取於彼蒼者何殷  
而君曰否夫年何必如君如君者何必盡有女  
注者天道挹亦天道其注之若濫其勿注若吝  
苟以為無怍乎天之降此軀也斯瞑而已矣所  
恨吾與君三十年姻交我之臍着君與君之不  
疑我俱非流俗所或庶幾方期白髮尚羊以老  
而不謂君之遽棄我去也嗟乎世無百歲之人  
而有千歲之誼以誼上帝應錄君晉授仙階以  
歲也天何時再旦也况也黔羸失職稱塞稍愆  
怛悼不可勝聊作家人語寄之樽俎倘一歆就  
之尚饗

哀辭一首

李侍御母封孺人哀辭

天道究何詰陽訛旋陰騭敦尹謚迺躬明信如  
左質僊李詎不遐宛委懼中阮夫子崢嶸人佐  
者抱芬郁嘉粟兩缶盈馨香薦彼瑟上帝寔臨  
女錫之醫閭玉清廟藉光輝照耀黼與黻遡言  
茁所氤封章下皇闕榮華不畢輪樵悴忽以聿



恫彼神靈慈閔爾多扶恤是時錦作襁且懷且  
以膝辛苦朝暮舖阿孤保終吉阿孤有父風電  
勉理前躅阿孤有祖風規恢總嶄嶄劬劬祖母  
劉翬翬李令伯依倚云夫何崇來闖其室遂令  
小弱孤五內鉞紛滑問之滿闔闔誼在身莫百  
一語寫十哀煌煌誦希烈楸桂列在陳明繒皓  
如潔

農丈人文集卷之十六

書記周禮寫



書